

DISSERTATIO MEDICA
INAUGURALIS

DE

HYDROPE.

QUAM,

ANNUENTE DEO TER OPT. MAX.

Ex Auctoritate Magnifici Rectoris

D. FRANCISCI VAN OUDENDORP,
HISTORIARUM ET ELOQUENTIÆ PROFESSORIS.

NEC NON

*Amplissimi SENATUS ACADEMICI Consensu,
& Nobilissimæ FACULTATIS MEDICÆ Decreto,*

PRO GRADU DOCTORATUS,

Summisque in MEDICINA Honoribus & Privilegiis, ritè
ac legitimè consequendis,

Eruditorum Examini submittit

GUILIELMUS EDDOWES,
ANGLUS.

Ad diem 17. Decembris 1751. hora loquoque solitis.

*Crescit indulgens sibi dirus Hydrops,
Nec sitim pellit, nisi causa morbi
Fugerit venis, & aquosus albo*

Corpore languor. HOR. Lib. II. Od. II.

LUGDUNI BATAVORUM,

Apud CONRADUM WISHOFF, 1751.

SPECTATISSIMO, INGENIOSISSIMO

V I R O

BENJAMINI STEAD.

NEC NON

REVERENDO, INTEGRRIMO

V I R O

THOMÆ HAYNES.

SUO PER AFFINITATEM FRATRI

CONJUNCTISSIMO

HANC DISSERTATIONEM INAUGURALEM

STUDIORUM SUORUM PRIMITIAS

Ea qua decet

Observantia

D. D. C. Q.

GUILIELMUS EDDOWES.

THE JOURNAL OF

THE

RESEARCH

OF

THE

RESEARCH

OF

THE

RESEARCH

OF

THE

RESEARCH

OF

THE

RESEARCH

OF



DISSERTATIO MEDICA
INAUGURALIS.

D E

HYDROPE.

§. I.



ydrops a voce græca ὕδωρ aqua, & ὄψις visus, aut ὀπτομαι video; est tumidus corporis habitus a sero plus minus corrupto in membrana cellulosa collecto, aut in cavo quodam corporis effuso, partes continentes distendente. Si in membrana cellulosa, quatenus musculos sub cute ambit, eosque cuti laxè adnectit, aqua congesta hæreat, vo-

catur Leucophlegmatia, ex λευκὸν album, & φλεγμα pituita, intercus, aut Hydrops anasarca, ex ἀνα per, & σὰρξ Caro, quæ ut Synonima tuto accipi possunt, licet Aretæus Cappadox, Fridericus Hoffmannus differentiam faciant, forte gradu differunt, sed plus minus diversam speciem non constituunt. Scrupulosis hisce differentiis exponendis non immoror, quum causæ, effectus, curatio prorsus eadem. Si ejusmodi aquæ congestio

A 3

par-

partem quandam occupat, ab ea nomen sortitur. Si in Capite, Hydrocephalus; in Cavo Thoracis, hydrops pectoris; tum inter pulmones & pleuram, aut inter mediastinum, aut intra pericardium, aut in spatiis cellulariis, sive inter contactus vesicularum aëriferarum pulmonis hæret. In Cavo abdominis Ascites dicitur, ab ἀσκός Uter, eo quod Utris in modum venter distendatur. Differt itidem situ; aut hæret in duplicatura peritonæi, aut ovario alterutro, aut utroque, aut tuba alterutra, aut utero, in quibus aliquando ad centenas libras aqua reperta fuit. Si circa testes ejusmodi tumor ortus, dicitur hydrocele ab ὕδωρ aqua & κήλη tumor, & sic de cæteris.

§. I I.

Obesitas, graviditas, tympanites subinde verum hydropem, & vice versa, hydrops graviditatem, obesitatem aut tympaniten. mentiendo Medicum incautum, proprios singuli affectus characteres non satis sigillatim examinantem, ægrumque nimis credulum decipiunt; nihilominus affectus hi adcurato prægressorum & phænomenorum in ægro præsentium & certo ordine per varia tempora sese excipientium examine haud diffiulter discernuntur. Hydropem semper præcedit cacochymia, aut plethora in cacochymiam versa, consistens in tenaci spissitudine, aut tenuitate, acrimonia focia; qualem graviditas non præsupponit. Alia phænomena in decursu graviditatis, alia in hydropis. In hydropico omnium functionum languor, vigor nullus, æger licet alacer fuerit, nascente & incresciente hydrope, torpescit, color luridus, universi corporis habitus insigniter (sive hydrops per corpus universum diffusus, sive aliquam tantum partem occupet,) flaccescit; tonus omnium partium remittit; Hæc eo magis increscunt, quo magis malum inveterascit, & quo copia magis augetur, acrimonia vim rodendi, destruendi acquisiverit efficacior. Si hæc omnia conferantur cum iis, quæ in obesis & gravidis deprehenduntur, nulla hos affectus discernendi difficultas. Signa pathognomica, sive characteres proprii tam in hydrope quam in gravi-

viditate occurrunt, sigillatim contemplandi, quos prudens & circumspēctus Præcticus non faciliè confundet. *Conf. Aphorism. Boerb. §. 14. n^o. 1. & Comment. van Swiet. ad hunc Aphorism. Obscurior distinctio, si hydrops cum graviditate coincidit. v. Fr. Hoffm. T. III. §. 19. pag. 526.*

§. I I I.

Aretæus Cappadox diagnosin exhibet Lib. iv. C. i. *Omni- bus (hydropicis) inquit, inest pallor, spirandi difficultas, diversis temporibus sægnes sunt pigritia multa, à cibo abalienatio, & si aliquid assumant, quamvis modicum & flatu carens, nihilominus valde inflantur, distensiones patiuntur, citra madorem eorum corpus est; idcirco neque in balneis sudore emadescunt; propterea albidii sunt & effæminati; somni sunt graves & torpentes, breves; animi deliquium, circa minima quæque sollicitudo, vivendi cupiditas. In gravidis hæc ex parte observantur, nunquam ita conjuncta ac in hydropicis, nisi graviditas cum hydrope complicata fuerit, ubi duplex onus.*

§. I V.

Tympaniten (qui itidem tumor abdominis, sed à materia flatulenta, elastica) prodit calor, extrinsecus corpori applicatus; cito enim abdomen, rarefacto intus incluso aëre elastica materia refertissimo, mox intumescit, quod dum fit, omnia Symptomata evadunt pejora; anxietas, respirationis difficultas, reliquæ molestiæ increscunt; item sonus à percussio abdomine notabilior; elasticitas inclusi aëris efficit, quod chordæ tympanum bellicum tendentes. Quid à tali distensione in visceribus contingat, notitia Anatomæ ostendit. Notum ex Physicis. fluidum elasticum ab omni parte æqualiter premere; tanta igitur est vis premens contra viscera abdominalia, quanta contra peritonæum, musculos abdominales & integumenta; indè obstructions viscerum, circulatio perturbata. Nec obstat, quod in graviditate ejusmodi mala non fiant, lentè in ea causa distendens invalescit, natura hic imperatrix non sup-
pressa

pressa nil agnoscit violenti; adeoque cum morbo minimè confundenda. Si quæ Symptomata in graviditate occurrant, temporis successu spontè evanescere solent. In tympanite augentur, sive materia elastica in duplicatura peritonæi, sive in cavo abdominis contineatur. Cæterum ascites & tympanites sibi admodum affines quoad causas, effectus & eventum. Uterque affectus à corruptione cujusdam visceris sæpe tantum in cadavere conspicua. Causa distendens in utroque malo fluidum est, fluidum causam materiale constituit; in Ascite aqueum, in tympanite aëreum, elasticum, utrumque inquinatum, foetidum, cadaverosum, exitus utriusque fere semper lethalis.

§. V.

Modus, quo hydrops fit, increfcit, ratioque sufficiens ex cognitis fluidorum elementis & conditione vasorum liquidò constat; & experimenta à Lowero aliisque instituta comprobant. Si in vivo animali vena aliqua major filo constricta per horam in eo statu permanet, oritur tumor œdematosus in illa parte, qua rami ad venam excurrant. Simile quid observant Chirurgi, dum ad enormes hæmorrhagias sistendas instrumentum venas valde comprimens applicatur, si hoc diutius relinquitur, pars in tumorem successive attollitur. Elegans experimentum ad demonstrandam Leucophlegmatix genesis in cadavere humano. Sumatur cadaver infantis in aqua cxx. gradus calida tamdiu relinquatur, donec calor naturalis in uniuerso corpore obtineat; sit tum ad manus liquidum tenuissimum, mobilissimum, croco tinctum per Syphonem sub aqua arteriæ immittatur, usque dum totum corpus turgat; tum illico frigidæ inmergatur, ut subito constringatur, in ea per nycthemerum relinquatur, ut arteriæ vi elastica sese in statum quietis restituendo possint fluidum contentum versus fines urgere. Cadaver apertum ostendet liquidum immissum ex parte in cava effusum, pro parte in membrana cellulosa expressum; est verus hydrops artificialis. Si aërem immittis, produces

INAUGURALIS.

ces emphysema, tympaniten &c. Si cadaver majus est, modo brachium pro experimento capiendum. Si immittitur fluidum rubicundum paulo spissius in venam manus, subclaviâ juxta humerum constrictâ, brachium intumescet; eoque aperto, conspicientur cellulæ pinguedinosæ mire distentæ, vix aliam ob causam, inquit *Frid. Hoffman.* quam quod propter positum obstaculum liquor immissus ex venis membranam adiposam percurrentibus in substantiam istam raram minus resistentem expressus fuerit.

§. V I.

Ex dictis sequitur 1. Hydropem oriri posse, dum arteriæ dilatatis orificiis excretoriis plus exhalant, quam venæ resorbent. 2. Ex venis resorbentibus fluidum aquosum ex arteriis cute acceptum pressione in truncis existente, & vim suam versus fines terminante exprimi, Hydropem nasci. 3. Diapedesi & diæresi utrorumque vasorum idem fieri. Eadem videtur ratio ipsa partium natura suffulta in fluxu menstruo & hæmorrhoidali. Argumenta ex occultis qualitatibus desumpta nil moror. Opinionum commenta delet dies, naturæ judicia confirmat. *Cicero.*

§. V I I.

Causæ antecedentes temperies laxa, humida, mora diuturna in locis frigidis depressis, uliginosis; opera mediante aquâ, aut in ipsa aqua instituenda, aëre jam frigido & humido existente, ut sunt eorum, qui lavando, piscando, canales mundando &c. vitam sustinent.

§. V I I I.

Alimenta inertia, cruda, farinosa, non fermentata, potus aquosi ultra necessitatem ingesti, vita otiosa, morbi acuti critice solubiles, sed deficiente requisitâ coctione, imperfecte soluti,

B

aut

aut non succedente defectu virium solutæ materiæ excretionē, ut crises metastaticæ, fomitem hujus mali ponunt, datâ occasione incendunt; hinc inflammationes, suppurationes, scirrhi certissimi Hydropis prodromi, modo natura prius non succumbat.

§. I X.

Evacuationes consuetæ suppressæ, neglectæ, sive hæmorrhagiæ spontaneæ, periodicæ, quæ juvenibus plethoricis familiares, sive sanguinis missiones artificiales. Nascitur inde plethora naturæ gravis, sub cuius onere languens diverticula quaerit.

§. X.

Omnes excretiones nimiae huc pertinent, ut natura, (quæ sola est sui seu vitæ conservatrix & deficientis restauratrix), in consueto suo opere persistat, requiritur iusta humoris vitalis copia, debita qualitas & aptus impetus. Jactura igitur nimia humoris vitalis sani causam sanitatis secum aufert, natura inermi in suis angustiis relicta. Causæ alimenta digerentes ex massa humorum vitalium in suas officinas secernuntur; hac igitur deficiente, deficiunt illæ causæ; deficientibus his, coctio impedita, chylus crudus, ex quo in sanguinem delato cacoehymia, nata hac, omne malorum genus, adeoque Hydrops oriri potest.

§. X I.

Excretiones profusæ retinendorum per vias naturales, sive morbosæ, sive malo mentis consilio productæ, ut exspuitio voluntaria salivæ, venus immodica, præposteræ purgationes alvi ope fortiorum purgantium, liquida vitalia solventium, putrefacientium; diarrhœæ spontaneæ diutius persistentes, dysenteriae. *Qui lienosi à dysenteria corripuntur, his longa super-*

veniente dysenteria, Hydrops supervenit, aut lienteria & pereunt. Hipp. S. vi. Aphor. 43. Videtur in hoc casu lienis substantia in liquamen acre putridum resolvi, & per venam portæ, ductum hepaticum in cavum duodeni deponi, quales casus subinde in cadaveribus obvii. Ut paucis dicam, omnes causæ debilitantes, Vermes, Calculi, animi pathemata. &c.

§. XII.

Causas allegatas observata Practicorum confirmant, aqua inter cutem nonnunquam à copioso frigido potu continuo provenit, quum præ nimia siti ad saturitatem quispiam multam aquam gelidam ingurgitaverit. Aretæus Cappad. l. c. Accusat præclarus Vir potum aquæ frigidæ ad satietatem ingurgitatæ: quid de aqua calida, Infusis indicis, nulla suadente necessitate, affatim quotidie ingestis judicandum? Rarissimus certè casus, ubi Hydrops potu frigido inductus, forte tantum corpore intus & extus æstuante; verum aquæ calidæ abusus nec tempore nec naturali satietate terminatus, vix alios habet limites, quam extremam impletionem. Aqua calida omnia penetrat, omnia laxat, omnia inertia reddit; cohæsiō tam in firmis quam in fluidis imminuitur; natura quasi fluido redundanti immersa iners redditur, nec chylopoësis, nec hæmatopoësis ad gradum debitæ perfectionis promoventur: unde cacochymia pituitosa, Hydropes, diabetes olim rarissimus affectus, & vix à majoribus medicis observatus, nunc temporis satis frequens aquæ potricibus, inprimis otiosis. Viri exercitio corporis, aquas facilius discutunt; exercitio corporis homo optime se munit in solo humido, depresso contra multos morbos. Si inter aquas hæreat, aquam calidam ingurgitet, mirum non est, si in Hydropem incidat. Plebeji debilitatem inde agnoscentes ad spiritum Juniperi refugiunt, à quo Vires contra Hydropem sperare possent, si parcissimus & rarior foret usus, & non plus aquæ assumeretur, quam sitis poscit; ast usu in abusum verso, pejor sequitur corporis conditio, ut optimè hic quadret dictum poëtæ,

Incidit in Scyllam cupiens vitare Charybdin.

Abusu hujus spiritus solida contrahuntur, fluida coagulantur, tenuiora in cellulas exprimuntur, deficientibus inde causis coctricibus defectus chyli & sanguinis boni; fatum ultimum apoplexia serosa, quæ fortè est Hydrops ventriculorum Cerebri, aut Hydrops corporis. Abstinencia & laborum necessitas hæc muliebria fata sæpè effugit. Firmiorem degunt vitam, qui in sudore vescuntur pane, modo leges justæ moderaminis non transiliunt. Maxima pars Hydropicorum, sprete victus ratione, malum quod sustinent, contraxere. Alii copia aquæ, alii cerevisiæ, alii vini, alii spirituum fermentatorum vi aromatica imbutorum, quandoque nulla necessitate imperante, in calamitosum hunc morbum incidere.

§. XIII.

Quanquam nulla victus regula cuivis utilis sensu absoluto ferri possit, cum tot sint differentiæ accidentales, quot sint homines, & in uno homine respectu alterius, quot sint partes, nihilominus magnus Hippocrates calamitates ex pravo victu ortas perpendens generali quadam regula hominum saluti consulere voluit. Cibum labori & laborem cibo proportionavit, aut proportionare voluit, nec ætatis, nec consuetudinis, nec tempestatis rationem inire neglexit, ut varia loca in ejus operibus obvia fidem faciunt. *Labor firmat, inquit, otium hebetat.* justum corporis exercitium aquosa superflua dissipat, secretionem promovet, elementa humorum condensat, nutritionem firmam reddit; plethoram, obesitatem præcavet; inde occasionem Hydropis ex humorum inertia nascituri præcidit. Omnia his contraria sunt causæ prædisponentes ad Hydropem, adeoque ex iis optimè intelliguntur. Itaque & morbus & medela simul sistuntur. Optime de his Hippocrates apud *van Swieten in Comment. ad Aphorism. Boerb. 106. pag. 154. Homo comedens sanus esse non potest, nisi etiam laboribus exerceatur, cibi enim & labores adversas inter se potestates, mutuo tamen ad sanitatem conferen-*

ferentes habent, labores namque ea, quæ adsunt, consumere solent, cibi vero & potus vacuata replere. Et alibi cibos & labores inter se conferendo effectus recensens monet, respiciendum esse, utrum cibi labores, an labores cibos superent, an moderate inter se habeant, quodcunque enim superatur, ex eo morbi contingunt; ex mutua verò inter se æqualitate sanitas est. Hæc de ratione victus.

§. XIV.

Exemplum Hydropis ex jactura nimia sanguinis inducti refert van Swieten, l. c. dicit, se vidisse fœminam, cui ob validissimos & sæpissime renatos animi affectus sexagesies & ultra vena secta fuerat intra anni spatium, quæ obesissima facta paucorum mensium intervallo 150. librarum pondere aucta fuerat, & quum continuo turgeret, renato sanguine, nova sanguinem mittendi necessitas urgebat magis quotidie, donec tandem soluto omni robore in Hydropem incideret. Patet hoc exemplo 1. obesitatem ad Hydropem disponere. 2. justam copiam humorum vitalium, justamque eorum densitatem requiri, ut vigor circulationis præcaveat nimiam pinguedinis productionem. Conf. §. 13.

§. XV.

Inter causas externas non infimum locum obtinet corporum irruentium vis, ictus, casus &c. ubi in gravioribus contusionibus humores effusi putrescunt, inde cum sanguine ad vitalia delati tragœdias ludunt. Sic milites gregarii peccatum aliquod admissum rigore juris militaris luentes pœnalibus ictibus plus ultro contusi lenta morte tabescentes, tandem in Hydropem ante mortem incidunt; vel oborta viscerum inflammatione correpti exstinguuntur. Illud frequentius, hoc rarius accidit: nam fere semper in locis contusis omnis pinguedo, fibræ musculares ex parte vasa cum fluidis contentis, (horrendum visu) in gelatinam putridam, vel in aquam conversa deprehenduntur. Putridum hæc liquamen inquinat universam vitalium massam &

efficacissimam mortiferi Hydropis causam ponit. In aliis conspicitur lien; in aliis hepar contusum, contenta substantia in liquamen nigrum foetidum conversa. In aliis liquor instar loturæ carnis in cavo thoracis vel abdominis, imo in ventriculis cerebri reperta fuit, Robustissimos & vere martiales inexorabili hoc fato periisse norunt & dolent medici castrenses & præsidarii.

Hujus credendi sunt visa cadavera testes.

Res in judicio statque caditque Virum.

§. X V I.

Aliis causis peculiaribus, quum ad allegatas referri possint, recensendis supersedeo. Si quis plura desiderat, adeat Frid. Hoffman. Bonet. Etmuller. aliosque insigniores Practicos.

§. X V I I.

Conditio ægri, natura & vis morbi inter se comparata, incrementum, pars obsessa eventum præsignant.

§. X V I I I.

Hydrops recens sola laxitate partium ab aquosis ingestis & vita otiosa in locis humidis oriundus, nullo morbo inveterato delitescente in subjectis cæterum sanis conveniente rerum non-naturalium usu, medicamentis evacuantibus, diureticis, purgantibus per vices adhibitis, interpositis roborantibus haud difficulter cedit.

§. X I X.

In prognosi non tantum morbus, sed & æger respiciendus, pacata mens ægri & religiosa observatio legum à medico præscriptarum ad sanitatem recuperandam plurimum facit: spretis
hisce

hisce inanis spes ægri & medici, nisi casu æger illis indulgeat, quibus magna fiat immutatio in interioribus, qualia appetitu insolito desiderantur. Ægrum immorigerum curari vix posse dicit *Celsus Lib. 3. cap. 21.* his verbis. *Hydrops facilius in seruis, quam in liberis tollitur, quia cum desiderat famem, sitim, mille alia tœdia, longamque patientiam, promptius his succurritur, qui facile coguntur, quam quibus inutilis libertas est. Sed ne hi quidem, qui sub alio sunt, si ex toto sibi temperare non possunt, ad salutem perducuntur. Ideoque non ignobilis medicus Chrysippi discipulus apud Antigonum Regem amicum quendam ejus notæ intemperantiæ mediocriter eo morbo iuplicitum negavit posse curari: Quumque alter medicus Epirates Pbilippus se sanaturum polliceretur, respondit, illum ad morbum respicere, se ad animum. Neque eum res fefellit, iste enim, quum summa diligentia non medici tantummodo sed etiam Regis enstodiretur, tamen malagmata sua devorando bibendoque suam urinam in exitium se præcipitavit.*

§. X X.

Morbi Hydropi focii, sive prægressi, sive supervenientes Hydropem reddunt plus minus periculosum; prout sua natura vitæ magis adversi. Senectus ipsa est morbus insanabilis, Hydrops senii obveniens mortem accelerat: ita si cuidam in ætate vegeta longo morbo vires exhaustæ sint, superveniente Hydrope ea restaurare facile non est, adeoque nec curare Hydropem.

§. X X I.

Hydrops à labe viscerum, scirrho, suppuratione, phthisi, lethalis fere pronunciandus; unde extinctorum plurima in practicis exempla, vix unum vel alterum persanati à tempore Hippocratis in hunc usque diem. Quibus hepar aqua repletum ad omentum eruperit, his venter aqua repletur & moriuntur. Hipp. L. VII. Aph. LV. Conf. Comm. de Gorter ad hunc Aphorism.

§. X X I I.

§. XXI.

Locus obsessus, Symptomata bene cognita exitum designant. Sitis â corruptela fluidorum mali præfagii, innuit corrosionem omnium partium, humoris acris per vasa erosa effluxum; inde dolor, inquietudines, pervigilia, pulsus inæqualis, intermittens; animi deliquia, mors.

§. XXII.

Hydrocephalus effusa & collecta intra cranium aqua, ossa in futuris removente, compresso cerebro in apoplexiam lethalem desinit; in pueris, ubi ossa cedere possunt, malum diutius protrahitur. In adultis cito lethalis.

§. XXIV.

Hydrops pectoris ab ulcere pulmonum, expresso sero, corrupto & retento intra pulmonem pure brevi suffocat. id subinde evenisse inspecta cadavera Hydrope pectoris extinctorum docuere. Hoc casu paracentesis nil juvat, quum fons mali exhauriri non possit. Nulla autem sunt signa, quibus hic affectus ab Empyemate discernatur.

§. XXV.

Neque Curationem admittere videtur Hydrops ovarii, aut tubæ Fallopii, ubi aquæ ad centenas libras collectæ hærent, vitam in partibus circumpositis suffocant. Secretio urinæ in renibus impeditur, tota massa sanguinis fit urinosa, putrida: unde sitis, pervigilia, animi defectus, vitæ extinctio.

§. XXVI.

Hydrops ingens uteri ab orificio interno coälito certo lethalis, nisi forte incisione, ut in partu cæsareo, aqua educatur.
Si

Si vero via per orificium datur, ab expedito chirurgo facile educetur; id autem fiat per vices, si una vice libra educatur, sufficit, partes interim internas & externas roborando.

§. XXVI.

Afcites cum graviditate ad maturitatem foetus relinquendus, tum sponte aqua cum foetu exit: de quo supra.

§. XXVII.

Prognostica ab excretis fere hæc sunt: si alvus soluta, aquosa, non foetida adeo, nec colorata, nec viridia, nec atra per plures dies dimittit, aut per vias urinæ, spiracula cutis forma sudoris magna copia ejusmodi humoris excernatur, sive sponte natura id fiat, sive dato purgante, sudorifero aut diuretico illæ excretiones excitatæ & promotæ fuerint; si corpus inde detumescat, functiones læsæ incipiant restitui, vitam de morbo triumphaturam indicat, & vice versa, morbum de vita, si inde symptomata augeantur. *Ab insania hydrops bonum. Hipp. Aph. v. S. vii.* Plurima de his occurrunt à Practicis notata, quæ allegare supervacaneum duxi.

§. XXIX.

D E C U R A T I O N E.

Hæc ex data causarum & modi, quibus hydrops oritur, expositione utcunque intelligitur, adeoque paucis eam expediam. Omnis hydrops vel est simplex, vel cum aliis morbis complicatus. Tum ipse hydrops vel est in principio, vel tractu temporis vires acquisivit, uti superius ostensum. Origo igitur tam hydropis, quam morbi focii curaturo noscenda, ut recta medendi methodo, medicamentis auxiliantibus naturæ succurrat, eam aquis liberet, iis ignoratis cæca & præpostera curatio.

§. XXX.

Quod si hydrops simplex, recens exquisito rerum non naturalium usu in subjectis vegetis fere curatur, evitando causas, quibus inductus, & adhibenda opposita. v. gr. si aër humidus, frigidus, uliginosus, opera in aquis peracta; alimenta pravi succi, abusus potus aquosi, aut spirituum stillatitiorum; vita otiosa, animi affectus tristes causam dederunt, contraria his in usum vocanda. Eligendus aër siccus, calidus, mora in superiori aedium parte super tabulatum ligneum, alimenta ficciora, boni succi, carnes aetate juniorum animalium, panis bis coctus, rite fermentatus &c. ea copia assumenda, ne gravent, ne superent vires digestrices, in hydropicis non adeo validas, licet in mali principio, eo quod debilitas praegressa plerumque inter causas hydropis sit. Potus sit parcus, generosus, vinum rubrum, austeriusculum inprimis convenit, aut cerevisia bonae notae. Exercitium corporis, quantum vires permittunt, quo secretionis viscerum soluti maxime promoventur, excretionis secreti expediuntur. Tranquillitas animi curationi inprimis favet. Externe conveniunt frictiones, balnea sicca, in arena vel clibano. Si his addis diuretica, purgantia, interpositis roborantibus, nil ultra requiritur.

§. XXXI.

Medicamentorum roborantium primatum obtinet Mars, & ex eo praeparata, v. g. limatura martis, eadem in vino Rheno soluta. Vinum hoc martiatum Celeb. Boerb. in debilitate & laxitate incomparabile deprædicat; item praeparata cum acidis facta à Sydenhamo laudata, vitriolum martis &c. Ex vegetantibus Radices Bistortæ, Tormentillæ, Gentianæ, Zedoariæ. Cort. Peruv. Fraxin. summitat. Card. Ben. absinth. Cent. min. Tanacet. & ejusmodi amara adstringentibus sociata deligantur; allium quoque non repudiatur.

§. XXXII.

§ X X X I I.

Purgantia in hoc affectu laudantur, quæ eliquant, solvunt, ut Mercurius (*) & præparata ex eo, Jalappa, Scammonium, Aloëtica, Gummi Acria, ut Gummi Ammoniacum, Galbanum, Opopanax, Sagapen. Mastich. pilulæ Ruffi, Succı vegetantium acriores, recentes, ut Ebuli. rad. Bryon. &c. Ut & quæ peracta purgatione roborant, quale est Rhabarbarum. De Rhabarbaro verum est, quod roboret, verum illa vis roborans in primis viis subsistit, visceribus interioribus non communicatur, quod ostendit ejus infusum, quod non relinquit alvum stipatam. Interim virtutem in hydropicis egregiam exerit. In intimos recessus penetrat, solvit & balsamica sua amaritie vegetantibus propria putredini resistit. Ex Rhei Extracto Gum. Ammon. sale polychresto & sapone Veneto, Balsamo Peruviano vel Tereb. exceptis conficiuntur pilulæ anti-hydropicæ, efficacissimæ, tutissimæ, ea copia exhibendæ, ut alvus tantum soluta fervetur, non ut profusæ diarrhææ insequantur, & corpus alimento destituatur. Qui bene dividit, tuto imperat. Ingens remediorum farrago in auctoribus obvia. Alii fossilia præferunt, alii vegetantia, alii sale ammoniacum; alii omne præsidium collocant in tinctura illa ob colorem cælestina dicta, quæ nil aliud est, nisi solutio cupri in solutione salis armoniaci. Laudato ingentia rura, exiguum colito. Quum horum propriam experientiam non habeam, satis esse ratus, si levioribus, tutissimis scopus obtineri nequit, ad illa modo recensita confugere; agenda & omittenda ex viribus ægri & morbi discere. Juxta Boerb. *Inst.* §. 1083. ubi asserit, non posse

(*) Non majus deobstruens quam Mercurius crudus est. Hinc quum morbus à nimis viscidis humoribus vasa excretoria cutis, renum &c. infarciuntibus ortus sit, Medicamen hoc cum diureticis vel diaphoreticis pro re nata exhibitum speratos poterit habere successus. Ad promovendum ingressum ejus in vasa lactea, quodam medio uti Terebinthina &c: dividi poterit, & sic ad gr. vj. plus minus quavis nocte exhibendus, ac sequentibus diebus diaphoretica, diuretica decocta superbibenda.

posse indicari agenda & actura, nisi perspectis causis, viribus vitæ & morbi, item in quo gradu exstiterint. Emetica multum commodi interdum producere possunt, præcipua sunt Crocus Metallorum, sal tartari emet. Ipecacuan; sed Sydenham Oper. om. p. 496. dicit: *nisi venter in tumorem insignem attolatur, omnino convenit, ut tota res evacuantibus per inferiora committatur.* Omnino ab iis abstinendum, si suspicio est, viscera esse labefactata.

Casus sunt observati, ubi pluribus sine effectu exhibitis, vesicatoria applicata speratum effectum produxere.

§. XXXIII.

Si tumor hydropicus adeo ingens, qualis subinde in ascite, sive aqua hæreat in tubis Fallopii, sive in ovariis, sive in duplicatura peritonæi, sive in Cavo thoracis, ut remediis internis evacuari nequeat, arte chirurgica via paranda. Locus incidendus ex parte affecta, modus, cautelæ, aliaque necessaria deinceps remedia, ex Chirurgicis petenda.

§. XXXIV.

Hæc pauca scopo meo sufficere existimo, quædam obiter attigi, quædam propositæ brevitatis ergo præterii, ea vero, quæ naturam morbi constituunt, pro virium tenuitate expedire conatus sum. Diffusa admodum est hujus morbi historia, quoad causas, loca obfessa, effectus, remedia, curationem quibus colligendis & describendis volumen requireretur. Præsentia, qualiacunque sint B. L. ut æqui bonique consulat, rogo.

F I N I S.